

Enkarselá na Kas

Den kada barío bo por haña nan: hende siegu, surdu, mudo, deformá, paralisá, hende ku problema di múskulo òf nèrvio, hende ku a pèrde un pia òf brasa, hende ku retardashon òf enfermedat mental. Algun a nase ku sierto inabilitat, mientras aksidente òf enfermedat a kousa otro hèndikèp.

Hende desabilitá tin un peso pisá pa karga. Loke mayoria hende ta hasi sin pensa, por bira un problema grandi pa un pèrsona hèndikèp. Por ta difisil pa un hende ku un brasa so bisti paña. Telefón, televishon, i radio, tin poko balor pa hopi hende surdu. Deporte ta impusibel pa hende ku sierto desabilitat.

Ma un di e luchanan mas grandi ku un pèrsona hèndikèp ta eksperensiá no ta su problema fisiko òf mental. E ta mas bien e barera sikológiko i sosial ku e mester enfrentá. Maske e situashon ta kambiano, tòg hopi biaha na nos isla un desabilitat ta sentensia un pèrsona na un bida di enkarselashon tras di e murayanan di su propio kas.

Tin bes, ta e pèrsona ku ta sufri di e hèndikèp ku ta imponé e sentensia aki riba su mes. Kisas e tin miedu kon hende lo trat'é, miedu di problemanan ku e por eksperensiá. Talbes e ta sufri di depreshon òf bergwensa di su kondishon.

Tin ora, ta famia di e pèrsona hèndikèp ku ta sentensi'e na su kas. Kisas nan tin bergwensa di nan yu, ruman, òf mayor. Kisas nan ta haña ku ta eksigí muchu trabou pa prepará un pèrsona desabilitá pa sali. Ma hopi bes ta nos falta, nos ku ta bon di salú, ku ta pone hende desabilitá destansiá nan mes. Ta un echu tristu ku hopi mucha, hóben, i asta adulto ta kulpabel di abuso verbal, prehuisio, aktitutnan insensibel, hari, i cherchá esnan ku ya kaba tin un karga pisá pa karga.

Tin ora nos weganan kruel ta bai mas leu ku palabra. Dios ta bisa: "No maldishoná un hòMBER surdu, ni pone un piedra dilanti di un siegu p'é trompeká" (Levitiko 19:14). Palabra di Dios tambe ta deklará: "Maldishoná ta esun ku ta hasi un siegu pèrdè kaminda." (Deuteronomio 27:18). Asta tin hende asina bestia ku nan ta kometé krímen kontra hende desabilitá. Resientemente nos a tende di un kaso ku un hòMBER a violá un señorita siegu, sabiendo ku e mucha muhé lo no por identifik'é.

Ma talbes mayoria di nos inkonsientemente ta enkurashá e pèrsona desabilitá pa isolá su mes dor di nos ignoransia. Hopi hende ta sinti nan inkomfortabel den presensia di hende ku hèndikèp. Nan ta asina distraí pa e "apnormalidat" ku nan no sa kon pa reakshoná, i p'esei ta evitá hende desabilitá.

Nos ta lubidá ku kada pèrsona--salú òf desabilitá--tin un parti fisiko, sikológiko, i spiritual. Si e parti mental ta limitá, esei no ta e totalidat di e pèrsona. Maske un pèrsona ta mankaron, esei no ke mèn ku e no por desaroyá den otro área di su bida.

Hopi hende hèndikèp ta sinti nan asina so, isolá, desanimá, lubidá, rechasá. Nan tambe ke forma parti di nos komunidad i gosa e plasernan di bida ku nos ta eksperensiá. Nan tambe tin emoshon, nan tambe tin mester di kompañerismo i amistad, nan tambe ke tin--I POR TIN--bidanan produktivo, nan tambe por ta aktivo den nos komunidad.

E aleman, Ludwig van Beethoven a komponé su mihó músika despues ku el a bira surdu. E ingles, John Milton, a skirbi su buki klásiko, *Paradise Lost* despues ku el a bira siegu. Franklin Roosevelt, a bira presidente di Merka maske tur dos pia tabata paralisá. Helen Keller a siña lesa, skirbi i papia maske e tabata siegu, surdu, i mudo.

Dios Su amor no ta limitá na esnan sin defekto. Nos kariño, interes, i amor tampoko no mester ta limitá pa esnan sin defekto. Nos mester demonstrá interes genuino na maneranan práktiko. Nos por ta "wowo pa e siegunan i pia pa esnan ku ta lam" (Job 29:15). Nos por hasi mas esfuerso pa inkorporá nan den nos komunidad, nos bida, i amestat. Nos por enkurashá nan pa sigui desaroyá otro área di nan bida. Nos por yuda libra esnan ku ta enkarselá na kas!